

Nadzorni odbor “Sindikata policijskih službenika Federalne uprave policije” na osnovu člana 51. Statuta Udruženja, sačinjava prijedlog i dostavlja Upravnom odboru Sindikata na usvajanje Pravilnik o pružanju pravne pomoći:

PRAVILNIK O PRUŽANJU PRAVNE POMOĆI

Član 1.

(1) Pravilnikom o pružanju pravne pomoći (u daljem tekstu Pravilnik) definiše se način, obim i vrsta pružanja pravne pomoći članovima “Sindikata policijskih službenika Federalne uprave policije” (u daljem tekstu Sindikat).

(2) Pravna pomoć, članovima Sindikata bit će osigurana u granicama novčanih sredstava Sindikata koja su predviđena Pravilnikom o korištenju finansijskih sredstva Sindikata.

Član 2.

(1) Prava i obaveze definisane ovim Pravilnikom isključivo se odnose na članove Sindikata.

(2) Član Sindikata za kojeg se utvrdi da je u trenutku pristupanja Sindikatu, znao ili mogao znati da mu je potrebna, odnosno da će mu biti potrebna pravna pomoć iz člana 5.ovog Pravilnika ista mu neće biti odobrena.

Član 3.

(1) Prava se ostvaruju podnošenjem zahtjeva Upravnom odboru od strane člana Sindikata. Zahtjev za pružanje pravne pomoći mora se odnositi na posljedice koje se dovode u vezu sa izvršenjem službenih radnji ili su vezane za ostvarivanje prava iz radno pravnog odnosa na relaciji uposlenik – poslodavac.

(2) Zahtjev za pružanje pravne pomoći član Sindikata podnosi pisanim putem koji može dostaviti Upravnom odboru Sindikata putem službenog e-maila, sekretara Sindikata, sindikalnog povjerenika unutar organizacione jedinice ili bilo kojeg člana upravljačkih tijela Sindikata.

(3) Zahtjev treba da sadrži datum podnošenja, ime i prezime podnosioca, kontakt telefon ili e-mail, kratak opis sadržaja za koji se traži pružanje pravne pomoći te potpisan od strane podnosioca. Uz zahtjev obavezno se prilaže fotokopija

raspoložive dokumentacije u vezi predmetnog događaja (rješenja, odluke, pozivi, izjave, službene zabilješke i sl.)

(4) Upravni odbor Sindikata donosi Odluku o pružanju pravne pomoći razmatrajući svaki zahtjev pojedinačno cijeneći ispunjenost uslova za pružanje iste, a koji su definisani ovim Pravilnikom.

Član 4.

Nakon podnošenja zahtjeva za pružanje pravne pomoći, Upravni odbor Sindikata je dužan naj kasnije u roku od 3 radna dana donijeti odluku o zahtjevu, te ukoliko je odobrena pravna pomoć, zadužuje se član Upravnog odbora Sindikata koji će kontaktirati podnosioca zahtjeva i "uputiti/uvesti" ga u prava osigurana ovim Pravilnikom.

Član 5.

(1) Članu Sindikata podnosiocu zahtjeva za pružanje pravne pomoći, pružit će se pravna pomoć u sljedećim slučajevima i to kako slijedi:

(a) U postupku otvorene interne istrage protiv člana Sindikata, član ima pravo na pravnu pomoć putem ugovornog advokata, advokatske kancelarije ili advokatskog društva (pravno savjetovanje i eventualno prisustvo advokata prilikom davanja iskaza).

(b) U postupku pokrenutog disciplinskog postupka otvorenog protiv člana Sindikata, član ima pravo na pravnu pomoć putem ugovornog advokata, advokatske kancelarije ili advokatskog društva (pravno zastupanje pred disciplinskom komisijom I druge pravno procesne radnje u vezi sa zastupanjem pred disciplinskom komisijom).

(c) U postupku pravnog zastupanja člana Sindikata u žalbenom postupku pred drugostepenim organom, odnosno pred Policijskim odborom član ima pravo na pravnu pomoć putem ugovornog advokata, advokatske kancelarije ili advokatskog društva (pravno savjetovanje, pisanje i podnošenje žalbe drugostepenom organu).

(2) U postupku pred sudom u svrhu zaštite radno pravnog odnosa ili u pokretanju tužbe kao pravnog lijeka drugostepenog organa, Upravni odbor Sindikata će o svakom slučaju pojedinačno odlučiti o svrsishodnosti takvih postupaka pred sudom i to na način da će od advokata ili advokatske kancelarije ili advokatskog društva pribaviti mišljenje o svrsishodnosti i izglednosti takvog postupka, te donijeti konačnu odluku o pružanju pravne pomoći I uzimajući u obzir finansijska sredstva Sindikata. Odlukamože da glasi:

- odobrava se pravna pomoć;

- odbija se zahtjev za pravnu pomoć;

- odobrava se sufinansiranje pravne pomoći u visini od 20% do max 50% (u odluci se naglašava tačan procenat sufinansiranja) stvarnih troškova postupka i isključivo angažovanjem ugovornog advokata, advokatske kancelarije ili advokatskog društva.

(3) Obim i vrsta pravne pomoći iz stava 2. ovog člana podrazumjeva sve pravne i procesne radnje poduzete po pravilima struke do okončanja postupka pred nadležnim prvostepenim ili drugostepenim Sudom.

Član 6.

(1) Sindikat može pokrenuti tužbeni zahtjev i druge postupke pred Sudom, odlukom Upravnog odbora zaštite bilo koje vrste prava Sindikata ili članova Sindikata kako pojedinačnu tako i kolektivnu uz poštovanje zakonskih procedura i načela.

(2) Radnje iz stava 1. ovog člana se poduzimaju vodeći računa o finansijskim prilikama i u skladu sa odredbama člana 1. stav 2. ovog Pravilnika.

Član 7.

(1) Troškove nastale primjenom člana 5. i 6. ovog Pravilnika u cjelosti snosi Sindikat, izuzev ukoliko je donesena odluka o sufinansiranju troškova postupka, kada Sindikat snosi troškove sufinansiranja u odobrenom procentu.

(2) Troškove postupka koji su nastali plaćanjem sudskih taksi, vještanja, fotokopiranja dokumentacije sl., snosit će podnosilac tužbe.

(3) Dosuđeni troškovi na teret tuženog, nakon okončanog sudskog postupka, pripadaju Sindikatu ili ugovornom advokatu, advokatskoj kancelariji ili advokatskom društvu u skladu sa ugovornim odredbama.

(4) Ukoliko je Sindikat sufinansirao troškove postupka člana Sindikata kod ugovornog advokata, advokatske kancelarije ili advokatskog društva, Sindikatu pripada sufinansirani procenat od ukupno dosuđenih troškova.

(5) Sindikat neće snositi pravne troškove člana Sindikata, ukoliko nije donesena Odluka o pružanju pravne pomoći, te ukoliko su prekršeni uvjeti, procedure i obaveze propisane ovim Pravilnikom.

(6) U slučaju negativnog ishoda sudskog postupka podnositelja zahtjeva za besplatnu pravnu pomoć, kome je ista odobrena, Sindikat ne snosi eventualno dosuđene troškove drugih strana u postupku.

Član 8.

(1) Ukoliko se utvrdi da je član Sindikata zloupotrebom, obmanom ili na drugi način protivno načelima savjesnosti i poštenja izdejsvovao odluku o pružanju pravne pomoći, isti je dužan na račun Sindikata uplatiti troškove pravnog zastupanja čiju visinu će odrediti angažovani advokat po važećem cjenovniku.

(2) Ukoliko član Sindikata odbije sporazumno nadoknaditi troškove iz stava 1. ovog člana, Upravni odbor će pokrenuti proces pred nadležnim Sudom u cilju nadoknade štete.

Član 9.

Član Sindikata koji ostvari pravo na besplatnu pravnu pomoć, a podnese Zahtjev za iščlanjenje iz Sindikata u roku od (5) mjeseci od dana okončanja postupka dužan je da izvrši povrat troškova pravne pomoći čiju visinu će odrediti angažovani advokat po važećem cjenovniku, osim u slučaju smrti ili neposrednog prekida radnog dnosa.

Član 10.

(1) Ovaj Pravilnik stupa na snagu danom potpisivanja ugovora Sindikata sa advokatom ili advokatskom kancelarijom ili advokatskim društvom, a najkasnije 90 dana od dana donošenja istog.

(2) Izmjene i dopune Pravilnika vršiće se na prijedlog Nadzornog odbora uz saglasnost Upravnog odbora Sindikata.

(3) Inicijativu za izmjenu i dopunu Pravilnika Nadzornom odboru može podnijeti Upravni odbor Sindidikata.

Broj: NO-02/22

Sarajevo:23.12.2022. godine